



Fasnecht 2023

Sujet:

Parkregime Lieschtel

Denke mr zrugg an die alte Zytä,
Wo mr mit Ross und Kutsche durch Lieschtel isch gritte,
Wenn mr am Ziel ahcho isch het mr nid lang müesse studiere,
Het sis Gspann an jedem Ecke chönne gratis platziere

Veränderige bruchts, do sin mr eus einig,
Ob guet oder schlecht, dasch jedem si Meinig,
Meistens bruchts es bitzli bis mr alli begriffe,
Ob d Veränderig guet isch oder mä se lieber hät loh schliffe

In Lieschtel passiert immer unglaublich viel,
Kei Stei blibt ufem andere, alles neu isch s Ziel,
E neue Bahnhof isch mr grad am baue,
Das duet Köste für d Stadt Lieschtel in d Höchi haue

Drum möchte mr das meh Lüt im Stedli chöme cho poschte,
Viel Lüt z Lieschtel, do darfs parkiere au öpis choschte,
Lieschtel attraktiv und zum verwile ahlocke,
Do macht doch Sinn d Lüt mit hoche Parkgebühre abzzocke

Bald ischs aber leider scho eso,
Das gar kein meh will mitem Auto uf Lieschtel cho,
Fairi Prise ihfürehre das wär doch guet,
Aber bi so übertriebene, do lüpfts eus dr Huet

Bi dr Post parkiere chasch dr nüme leischte,
dasch dr Place to be, dört choschtets am meischte,
Ä Schand sind euri ungrechtfertigte Prise,
Die ganzi Luhnä düen si eus vermiese

Z Lieschtel parkiere isch e graus oje,
uf de Bänkli im Stedli sitzt bald niemer meh,
Parkuhre gsehsch hüt an jedem freie Eggli,
Lieschtel möchte halt dr 5-Liber ha und sWeggli

Mit de ÖV, em Velo und z Fuss darfsch no gratis cho,
Au wenn das Gschichtli in es paar Johr vielleicht vo vorne duet ahfoh,
Abschliessend düend mir Köstümgetreu drüber richte,
so liebi Stadt, düen dir Lieschtel vernichte